

K23-51
1

中國方志叢書·華北地方·第二三五號

據清·呂懋勛等修袁廷俊等纂
光緒元年刊本

影印

陝西 省

藍田縣志

附鞏川志及文徵錄

(二)

成文出版社有限公司印行

中華民國五十八年 月壹一版

藍田縣志

附輞川志及文徵錄

全二冊

發行人：黃 成 助

台北郵政信箱二二六〇五號

出版者：成文出版社有限公司

台北郵政信箱二二六〇五號

台北市羅斯福路三段279之二號

電話：三三〇一三二號

印刷者：東南印製廠有限公司

和平西路二段70巷83弄29號

內政部登記證內版台業字第一一四七號

藍田縣志卷十二

循良傳

漢文有云與朕共治天下者二千石及良有司耳唐
代宣宗御屏徧貼縣令姓名有異政者卽注其下以
便超擢誠以親民之職治亂安危之本繫焉 國

朝吏治之盛邁越前代藍田地逼山曲民人瘠苦蒞
斯土者代多循吏父老傳聞往往數十年及百餘年
之久尙有能道其姓氏記其事跡者善政之感人深
哉作循良傳

晉

張輔字世偉南陽西鄂人漢河間相衡後幼有幹局與從母兄劉喬齊名補藍田令不爲豪強所屈時疆弩將軍龐宗西州大姓護軍張浚宗婦族也僮僕放縱爲百姓患輔繩之殺其二奴又奪宗田二百餘頃以給貧戶一縣稱之

晉書

唐

崔縱博陵安平人授藍田令德化大行縣人立碑頌德仕終太常卿封常山縣公諡曰忠

唐書

宋

袁端字廷芝濟南人嘉祐八年以殿中丞宰藍田植桑課
稽增修常平義倉藥局館舍

府志

張德直字伯直平陽人貞祐三年進士釋褐新平簿辟藍
田令清慎才敏秩滿父老詣行臺留再任及去之日爲立
生祠遷澠池捕詐召補省椽選授廵院使終於同知武勝
軍節度使事

元

雷學字從仕至大四年爲藍田尹政清刑簡有重修縣廳

藍田縣志

卷十二循良傳

二

記以下悉
本前志

荆茂字仲昌覃懷人至正三年爲藍田尹興利除弊愛民
以誠有昆弟爭水利茂諭以產業容易得骨肉不可疎昆
弟皆叩謝和讓而去

俺都字成之燕山人至正五年爲藍田達魯花赤薄刑輕
徭禮老興學不期日而政成

明

王科字晉卿河南涉縣人正德十一年進士嘉靖元年任
勸課農桑振興學校扶弱鋤強風俗丕變城隘無水導西

山水入城毀淫祠凡城郭官署廟學多方修建規模煥然
後升工科給事入名宦北關有祠邑民歲時致祭

韓瓚山西絳州人嘉靖四年任勤政愛民清操自勵人不
能以利浼凡所行恐不便於民後升漢中府入祀名宦祠
翟清直隸大名人嘉靖十一年由高陵改任慈祥愷悌士
民德之

張洸山東鄒縣監生嘉靖十七年由縣丞升任廉介自持
不受私謁其子弟亦能甘淡泊雖一蔬不私取行戶會審
編差徭晝夜計算調停甚均卽老胥猾吏莫能售其奸解

綬之日琴劍而歸其三代下廉吏哉

呂好古山西定州孝廉嘉靖二十七年任守如冰蘖問民
利病悉與處分聽訟不事刑威得其情則哀矜不已至懲
強抑暴不少恕自此奸猾屏迹當道嘉之美委盤查凡外
郡邊陲皆所周歷去之日百姓肖像尸祝焉入名宦祠
楊紹先山西高平孝廉崇尚學校寬卹里甲士民愛戴
齊塘山西榆次縣人明察果斷胥吏懾服升工部主事
楊培山西解州孝廉清介有守愛民如子積倉糧賑貧乏
士民德之

陳一夔河南光州選貢省節里甲制伏強梁百姓立祠於南關歲時享祀

李景登遼東廣寧進士潔己愛民加意學校時礦稅織造並行民不堪苦奸民預賂官當左右營幹票帖提取則以一索十包納則以十准一公申文罷征民得息肩又創建尊經閣後升漢中府知府

王邦才河南盧氏孝廉萬曆二十七年任精明練達拓關帝廟新呂氏祠創子城改官道砌泮也建縣前坊植城池以柳政治一新至社學社倉鄉社厲壇義塚諸事一一修

復惜審編墮總書之計逐糧坐丁貽藍民害君子有遺議焉後升濟南府同知分守遼東厯官主事

前志云按紀事本末云邦才以萬厯三十五年任藍田知縣發奸剔蠹與稅監梁丞相左爲丞丞逮

梁一道山西稷山孝廉孝以事親慈以待民百民感之皆知行孝毀淫祠崇正義躬親課士學校大興當道屢有薦剡尋以疾卒立祠南關

沈國華山西潞安孝廉萬厯四十一年任蒞政精明聽斷如流公餘卽延儒論文於北門外建會文館每月朔二日

躬詣會所課士凡饌具皆俸資摩鞞川圖刻石行世重修
縣志四卷升寧海州知州

雷鳴時四川選貢因流寇出沒無常北城積陰易頽用磚
包之當時不無遺議而數十年於茲能永逸者猶稱公方
焉升商州知州

楊明禎山西偏關孝廉崇禎年間任慈良易直民咸德之
皇朝

王廷用遼海人順治六年由華州代篆時值鄉兵譟變後
人心洶洶兼杆賊盤踞山谷伺窺城垣藍民不安衽席公

多方設備每夜沿城巡視衣不解帶者四十餘日

顧其言字介石江南上海人崇禎庚辰進士順治八年署
篆清慎自矢釐剔宿弊錢穀詳明敦崇學校暇則登山涉
水修補風土建文峯於天馬山工未竣以艱歸

蘇就大直隸交河歲貢順治十年由教諭陞任修學宮濬
水道復鎮集補津梁易直子諒在任五年致仕去士民卧
轍留之立生祠金山界陞德政碑於署西

郭顯賢浙江海寧人公廉視事愷悌作人肅積吏葺巖城
開水道建文峯久疲之邑百廢俱興矣

趙人鑑直隸滑縣進士革奸除弊整肅里衛民今受益焉
鄧士英江南如臯例監均平里甲崇尚學校創義學置學
田建魁星樓於南城東隅以艱歸民立去思碑

林世榕廣東澄海舉人居心仁厚政寬刑清自遭兵燹後
民多失業世榕招集流亡散給牛種農務興田野闢允慎
於讞獄情矜法疑多所原宥解組歸圖書外無長物云重
修四呂祠又添建韓柳祠

張澂直隸景州進士才識明敏愛士惜民詳憲移修文廟
一時文風丕振以艱歸

李元昇字東杲直隸清豐舉人慈廉勤慎表節孝舉鄉飲
纂邑志曠典俱興修倉廩先農壇節孝祠及辦理軍需悉
捐俸措辦里衛無擾調署高陵潔己愛民頌聲遍野兩邑
之民爭於境上迨解篆歸士民攀留哭送數十餘里

丁鵬監生由鎮安調署事不擾民民立去思碑

岳濬廕生由西安同知調署溫恭爾雅政簡刑清歷官至
山東巡撫

周崧曉江西鄱陽縣人乾隆壬辰進士選湖南瀏陽令以
憂歸服闋謁選揀發陝西補藍田邑多怪風建風神廟禱

之患遂息瀟河屢決築石埧禦之遇災稔輒捐廉賑濟南山內多江楚開墾流寓常訊一無籍游民設法鉤距得渠魁數十人悉置之法渭南回民械鬪幾變檄委馳訊僅戮首惡其折獄明決多類此至若禁換號馬清查地糧創魁星樓以培文風士民至今稱之道光十八年人祀名宦

案檔

馬學賜直隸遷安縣人乾隆癸丑進士接紳士以禮詳問地方利弊語不及私人亦無敢干以私者邑有薛家灣等渠屢興訟履勘後設法修濬不數月渠成課農桑勤聽斷建義倉合邑醵數千金建生祠諭以干禁以金歸書院調

任之日遮道攀留及嘉慶二年楚匪竄入商雒調辦軍需
供支無誤事不擾民距今四十餘年士民猶稱道不衰云
道光十八年入祀名宦祠

檔案

俞廷樟浙江人時商雒用兵軍需旁午供億如雲事皆辦
治而人情不擾比賊竄入境設卡房練鄉勇賊望風遠遁
民賴以安

以下采訪冊

徐雙桂漢軍正黃旗人蒞政勤敏辦理軍需節省理甲冗
費練鄉勇立堡寨賊匪不能滋擾民至今稱利焉

邵琨號篠林浙江烏程舉人居心渾厚惜民愛士衛糧多

詭寄隱匿諸弊琨詳請清釐賦無逋累立總局以省差徭
添膏火以宏作養士民賴之

陳夢蓮福建優貢聽訟廉明體恤里甲時西陲用兵派藍
田車馬協濟永壽夢蓮以邑乏車馬請兩驛代一車里民
利之甫三月將受代去士民懇留格於例不行

劉達泉號森生江西奉新縣人道光二十四年到任操守
高潔優禮士人政簡刑清盜賊屏跡籌添書院生息商本
建立棲流所收養軍流遣犯不令擾累鄉民邑人謳思至
今不替